

# Primerë cartë nabëquë'e San Pablo lu Timoteo

**Bëquë'e Pablo cartë rë' lu Timoteo**

**1** Na Pablo, nahia poshtë shtë Jesucristo por mandadë shtë Dios el quë nagunë salvar lë'e hia'a. Bëshe'ldë Dadë Jesucristo na; na më el quë naguëne'e vidë sin fin juntë con lë'i'. <sup>2</sup>Quëquëa'a cartë rë' lul, Timoteo, nal cumë ziquë shinia purquë gualdí ldú'ul Jesucristo iurë guni'inúa lë'ël diza'quë. Rac shtua'a gápël favurë shtë Dios, quë guëga'a ldu'u më lë'ël, quë rbedchí ldú'ul por pudërë shtë Dadë Dios con Jesucristo, Shláma'a.

**Gulë gapë cuidadë por ldai' falsë**

<sup>3</sup>Antsë bëna incarguë lë'ël guëá'nël ciudá Efeso mientras tsahia regiuni Macedonia; gunia'a lul iurní de quë napë quë guëñibé'al mënë parë adë guëluá'adi'i rall stubi clasë ldai'. <sup>4</sup>Nu adë guëqué'ëdi'i rall listë llëduni ra lë shtë shtadë guë'lú rall, nu adë gúnëdi'i rall cuendë di'dzë shtë nguui bishi purquë fin shtë ra cusë ni nadë más rdildi di'dzë ra mënë. Adë runë rahin compa'ni parë guëdë'na'a cumplir lo quë narac shtu'u Dios. Sulë por fe gúnë

cumplir voluntá shtë më. Grë ndë'e quëhuna incarguë lul stubi vuellë.

<sup>5</sup>Lo quë narac shtua'a gunë të, gac shtu'u të sa' të con guëdubínú ldu'u të sin mal llgabë, nu tsaldí ldu'u të Jesús de verdá. <sup>6</sup>Bëldá mënë nabësa'në lu nezë za'quë shtë Dios, guanaldë rall tëchi di'dzë nadë guëlluí'idi'i. <sup>7</sup>Rac shtu'u rall gac rall mësë shtë lëy nabëquë'e Moisés perë adë riasëdi'i rall pë lo quë narni'i rall. Rac bë'adi'i rall pë runë cuntienë di'dzë narni'i rall con llëru'bë confiansë.

<sup>8</sup>Rdë'e hia'a cuendë de quë lëy na za'quë, sulë si talë guëlua'a hia'a de acuerdë según voluntá shtë Dios. <sup>9</sup>Rdë'e hia'a cuendë de quë lëy adë rzúdi'i lu ra narunë bien purquë Dios bédë'e lëy parë grë ra mënë mal con grë ra narzu'bë diáguëdi'i shti'dzë Dios, grëtë' ra narunë cuntrë Dios con ra nanapë duldë, grëtë' ra nadë runë rëspëti Dios con grë ra nadë nédí'i gunë cuendë shti'dzë më, grë ra narguini shtádi' nu ra narguini shníf'ai', grëtë' ra narguini mënë gati mënë, <sup>10</sup>nu grë ra narquënú tse'lë sa'll, nu grë ra naná rquënú mizmë sa' nguui, grë ra narbaa'në parë cu rall dumí,

parë grë ra naná bishi ra, nu grë ra narunë jurar con bishi; por ra cusë ni rzu lëy shtë Dios. Nu lë'ë lëy rzu parë grë ra narunë cuntrë enseñansë za'quë. <sup>11</sup>Ra enseñansë rë' nahin de acuerdë con diza'quë shtë Dios. Di'dzë ni rni'i de quë llëru'bë na pudërë shtë Dios. Mizmë lë'ë më bënë'ncarguë diza'quë ni guiahia.

**Rdë'ë Pablo graci lu më  
por favurë nabënë'ncë më**

<sup>12</sup>Quëgdë'ëhia graci lu Dadë Jesucristo, bënë'e më pudërë parë guadi'dza diza'quë purquë gualdí ldu'u më na ziquë tubi muzë nagunë cumplir voluntá shtë më. Gulé më na parë guna shchi'ni më. <sup>13</sup>Gulé më na aunquë antsë napa gustë guní'ihia didzabë guëc më, bëna cuntrë lë'ë më, gurushtiáhia guëc më, perë bëga'a ldu'u më na purquë todavía adë guc bé'adia'a pë canihuna. Adë bëdchínidi'i llni shtë Dios guëca. <sup>14</sup>Perë llëru'bë favurë napë më parë na; iurne' rac shtua'a lë'ë më; rialdí ldua'a shti'dzë më. Grëhin ze'dë de Cristo Jesús purquë nahia unidë con lë'ë më.

<sup>15</sup>Na ciertë nu grë mieti napë quë tsaldí ldu'u rall de quë Cristo Jesús bidë lu guë'dchiliu parë gunë më salvar grë ra nanapë duldë. Nu nahia primërë pecadurë entrë grë mieti. <sup>16</sup>Perë bëga'a ldu'u më na, sulë parë guëlua'a grë pacënci shtë më la'ni vidë shtëna. Guca primërë entrë grë ra pecadurë, perë lë'ë më gulé më na parë gaca tubi ejemplë lu grë ra natsaldí ldu'i lë'ë më tē parë gapë rall vidë sin fin. <sup>17</sup>Por ni runë tucarë guëdë'ë mieti graci

nu hunurë lu Rëy nanabani parë siembrë, el quë nadë rátidi'i, el quë nadë chu rnádi'i lúhi', parë lúniquë Dios verdaderë nanápëdi'i fin. Amén.

<sup>18</sup>Timoteo, cagnia'a lul ziquë shinia, guagla'guë tsaldí ldú'ul lë'ë më con buen llgabë. Ra di'dzë naguni'i ra muzë shtë më iurë bé'nël recibir dchi'ni shtë më, gunë rahin compa'ni lë'ël iurne'. Guc tubi suldadë za'quë shtë Jesús. <sup>19</sup>Adë guësá'nëdi'il fe shtë'nël sino tsaldí ldú'ul lë'ë më más. Guagla'guë lu shnezë më con buen llgabë, pues bëldá mënë bëniti rall lu shnezë Jesús. Bëqué guia'a rall llni nabëdë'ë Dios. <sup>20</sup>Zni guzac Himeneo nu Alejandro, lë'ë naná bëna intriegu lu Satanás tē parë gac bë'a rall rqui'ni cuezë ra di'dzë dzabë narni'i rall cuntrë Dios.

**Gulé guna'bë Dios por grë mënë**

**2** Primeramëntë rac shtua'a gunë tē ruëguë lu Dios, nu gulë guna'bë lu më, nu gulë guadi'dzë'nú lë'ë më, nu gulë bēdē'ë graci lu më por grētē' ra mēnē. <sup>2</sup>Gulë guna'bë lu Dios por grē gobiernē nu grētē' autoridá tē parē guēdápā'a tubi vidē sin dishi'bi, nu parē guēdē'na'a cumplir voluntá shtë më nu parē guēdápā'a vidē naná de acuerdē con shti'dzē më. <sup>3</sup>Zndē'ë rac shtu'u Dios guēdē'na'a cumplir naná correctē delantē lu më, el quē nagunē salvar lē'ë hia'a. <sup>4</sup>Rac shtu'u më grētē' nguiu gac salvar nu rac shtu'u më grētē' nguiu gac bë'a rall guadē naná verdá shtë më. <sup>5</sup>Nanú tubsē Dios nu nanú tubsē nazú guēláu entrē nguiu

nu Dios; më ni rni'inú Dios por ra nguii. L'é'i' na Dadë Jesucristo. Na më nguii. <sup>6</sup>Jesucristo bënë intriegu mizmə l'é'i' lu galguti parë gudilli më duldë shtë hia'a con präci rënë shtëi'. Iurë bënë Dios disponer, bënë më testificar por galguti shtë Jesús gunë më salvar l'ë hia'a. <sup>7</sup>Gudili më na ziquë mensajërë nu poshtë shtë më, nu parë guëluá'ahia ra mënë nanádi'i më israelitë lla tsaldí ldu'u rall nu parë gac b'ë'a rall pë na verdá. Ruadi'dza verdá, lëdë bishidi'i.

<sup>8</sup>Por ni rnia'a lu tē, rac shtua'a de quë guëdubi ladë guëna'bë ra mënë lu Dios, guëldisë rai' oraciuni lu Dios, perë sulë con ldu'u limpi sin ni tubi llanë, nilë dishi'bi. <sup>9</sup>Nu rac shtua'a de quë ra na'a gacu rai' shabë rai' ziquë runë tucarë, lëdëdi'i con lujë. Gapë rai' rëspëti lu sa' rai'; adë guëzë'ëdi'i rai' begu con lujë u orë u guë'ë naná lasaquë zihani dumí. Gácudi'i rai' shabë nalasac zihani dumí nadë más parë guëná mënë lo quë nanapë rall.

<sup>10</sup>Mejurë gacu ra na'a stubi lari naná obrë za'quë ziquë runë tucarë gunë mieti naná shmënë Jesús.

<sup>11</sup>Ra na'a napë quë guëac dchi parë guësë'dë rai' nu gac rai' obedientë.

<sup>12</sup>Adë rdé'ëdia'a sí guëlua'a ra na'a ra shmënë Dios, nilë rni'bë'adi'i rai' nguii sino guëac dchi ra na'a

<sup>13</sup>purquë primërë bëntsa'u Dios l'ë nguii; despuësë bëntsa'u më l'ë na'a. <sup>14</sup>Adë bësiguédi'i mëdzabë l'ë Adán sino Eva. Por naná gugué na'a iurní, gulaguë na'a la'ni duldë

<sup>15</sup>perë gac salvar ra na'a iurë ralë ra shíni', si talë tsagla'guë tsaldí ldu'u rall shti'dzë më, si talë rac

shtu'u rall Dios nu si talë quërelde rall bien lídchill, nu si talë adë gúnëdi'ill cumplir deseo mal nananú la'ni ldu'ull.

### Ra naná encargadë con shchi'ni Dios

**3** Si talë tubi nguii rac shtú'ull gápëll catë guëribé'ai' ziquë encargadë shtë los de más shmënë Dios, pues nahin tubi cusë za'quë lo quë narac shtu'u mënë ni. <sup>2</sup>El quë nanapë carguë ni, rqui'ni guëbánil tubi vidë za'quë lu sa'll tē parë ni tubi adë chu guëni'idi'i guëquëll. Napë quë gápëll mizmə l'ëll de grë duldë; gápëll tubsë tsé'lëll. Gac mënë ni de buen llgabë; gáquëll më rëspëti. Gáquëll tubi narunë recibir visitë lídchill, nu gáquëll nasini parë guëluá'all los de más mënë.

<sup>3</sup>Adë gúdi'ill zili vini; adë quílidi'ill dishi'bi, ni gáquëdi'ill narzebi ldu'u pë shtë mënë. Más bien gáquëll tubi nguii nadu'u nu adë tildi dí'dzëdi'ill con sa'll; adë sébidi'i ldu'ull dumí.

<sup>4</sup>Nu rqui'ni guëribé'all lídchill za'quë za'quë, nu shínill gapë rai' rëspëti lu shtadë rai'. <sup>5</sup>Si talë adë gáquëdi'i guëribé'all lídchill con shínill, ðlallë gáquëll guëribé'all los de más naná grupë shtë shmënë Dios? <sup>6</sup>L'ë encargadë shtë shmënë Dios, adë gáqui' tubi më nanapë du'pë tiempë dizdë bé'ni' recibir Cristo Jesús, no sea quë ldáguëll la'ni mizmə condenación nagulaguë mëdzabë; guc shtú'ull gáquëll më ru'bë. <sup>7</sup>Nu rqui'ni tubi encargadë con shmënë më gáquëll rëspëti por los de más nanadë rialdidi'i ldu'i diza'quë, no sea guëldáguëll lu duldë nu ra sa'll guëni'i guëquëll. Ni na tubi trampë shtë Satanás.

### **Ra narunë compaṇi ra encargadē con ra shmēnē Dios**

<sup>8</sup>Zni zac, ra diáconos, ra narunē compaṇi entrē ra shmēnē Dios, gac rai' mēnē rēspēti, mēnē narunē cumplir shtí'dzi', mēnē nadē rzuu'dchidi'i nu adē rzébidi'i ldu'u rai' dumí. <sup>9</sup>Napē quē gac ra mēnē ni nguui naná riasē bien diza'quē naná bēru'u lu llni iurne'. Gac rai' nguui sin ni tubi engaṇi la'ni ldú'i'. <sup>10</sup>Primērē gac probar ra mēnē ni, si talē adē chu guēdchí'bēdi'i galquiá cuntrē nguui ni. Hia guēná'zi rai' dchi'ni ziquē muzē shtē los de más shmēnē Jesús. <sup>11</sup>Mizmē zni ra tse'llē shtē diáconos gac rall mēnē rēspēti; gáquēdi'i rall nachismē; gac rall ra naquēhunē cumplir shtí'dzi'. Gac rai' na'a za'quē tē tsaldí ldu'u sáhi' lē'ē rai'. <sup>12</sup>Tubi diácono napē quē gápēll tubsē tsé'llēll, nu napē quē guēnibé'ai' bien shíni' con grē shfamíli' <sup>13</sup>purquē ra narunē sirvē ziquē diáconos, si talē gunē rai' cumplir bien shchi'ni mē, gunē rai' gan rēspēti nu confiansē shtē sa' rai'. Guadi'dzē rai' diza'quē shtē Cristo Jesús sin quē adē rdzébēdi'i rai'.

### **Diza'quē shtē Dios**

<sup>14</sup>Rac shtua'a gue'dē guēnahia lul lueguē, perē mientras quēquēa'a ra cusē rē'. <sup>15</sup>Si talē gac ldé'ēhia, gac bē'al lla runē tucarē guēquērédēl entrē los de más shmēnē Jesús, quiere decir, entrē ra famili shtē Dios. Pues grupē shtē shmēnē Dios na ziquē pilari narapē hui'u. Na rall ziquē cimientē shtē hui'u naná quēhapē verdá shtē Dios. <sup>16</sup>Llēru'bē

na ra enseñansē nadápa'a. Bēlua'a mē rahin; iurní rialdí ldu'u hia'a ndē'ē:

Bēdchini Dios con cuerpē shtē nguui,  
nu Espíritu Santo guní'i' tubldí na shcuendē mē.  
Guná ra ianglē lu mē.  
Ra mēnē biadi'dzē rall diza'quē shtē mē lu ra mēnē guēdubi naciuni.  
Mēnē gualdí ldu'u rall shti'dzē mē,  
nu bē'nē Dios recibir lē'i' lu gube'e stubi.

### **Ra narlua'a tēchi lu shti'dzē Dios**

**4** Espíritu shtē Dios rni'i' ldi de quē lúltimē tiempē bēldá mēnē guēsa'nē rall shti'dzē Dios. Tsanaldē rall tēchi ra espíritu mal narsiguē, nu tsaldí ldu'u rall stubi ldai' falsē naze'dē de mēdzabē. <sup>2</sup>Guēquē diaguē rall di'dzē shtē ra mēsē falsē naná ziquē guetē nadchi'bē lu dchi'li. Llgabē ra hiumbrē ni adē rínidi'i ra; nahin ziquē tubi cusē naná cuē gui'i con gui'bē ldē; hiadē rínidi'in. <sup>3</sup>Ra mēnē ni nēdi'i rall guēts'a mieti; nēdi'i rall gau mēnē belē; perē Dios bēntsa'u grētē' dau ni. Na parē ra narialdí ldu'i lē'ē mē gau rallin, nadē más guēdē'ē rall graci lu mē. <sup>4</sup>Grētē' nabēntsa'u Dios bien nahin. Ni tubi adē chu guēquē guiá'adi'in sino gulē bē'nē recibirin. Gulē bēdē'ē graci lu mē <sup>5</sup>purquē shti'dzē Dios runē ldai' grētē' guēc dau iurē rná'ba'a lu mē.

### **Tubi muzē za'quē shtē Jesucristo**

<sup>6</sup>Si talē quēgluá'al enseñansē rē' lu ra bēchi sa'l, iurní nal tubi

muzè za'què shtë Dadè Jesucristo, nu mizmə lé'él tsagla'guè gac alimentárèl con shti'dzè Dios. Tsasèl más ldai' za'què narianáldèl téchi'. <sup>7</sup>Adè rúnèdi'il cuendè ra enseñansè falsè, nilè cuendè falsè sino què ziquè tubi narunè ejercici diari, bèsè'dè shti'dzè Dios bien. <sup>8</sup>El què narunè ejercici quèhúnèll provèchè por du'pè tiempè perè el què narunè ejercici espiritual, el què naquèhunè cumplir voluntá shtë Dios, quèhúnèll provèchè iurne' mientras quèrèldèll lu guè'dchiliu nu quèhúnèll provèchè parè tubi vidè naguèdchini más despuès. <sup>9</sup>Di'dzè ni na verdá nu runè tucarè grè mieti tsaldí ldu'u rallin. <sup>10</sup>Ze'dè guèdchini stubi vidè; por ni rdé'na'a dchi'ni; rdé'na'a fuersè purquè rialdí ldu'u hia'a shti'dzi'; dzulèza'a Dios nanabani. Na mè el què nardè'è vidè parè grè mieti perè másru'u gunè mè salvar ra naná rialdí ldu'u shti'dzè mè.

<sup>11</sup>Bèlua'a nu gunibè'a grètè' enseñansè rè'. <sup>12</sup>Gubani bien guèdubi tiempè tè adè gúnèdi'i mènè desprèci lé'él purquè nal sultèrè, más bien gáquèl tubi ejemplè lu grè ra narialdí ldu'i diza'què. Gáquèl ejemplè za'què manèrè naruadí'dzèl nu por conductè shténèl. Gáquèl ejemplè lu sa'l con purè llgabè limpi. <sup>13</sup>Mientras lè'è na guelda nga'li, guagla'guè bi'ldi ra Sagradas Escrituras lu ra mènè nu biadi'dzè lu rai' shti'dzè Dios. Nu bèdè'è consejo lu rai' lla runè tucarè guèquèrèldè rai'. <sup>14</sup>Siempre bè'nè dchi'ni con fuersè nu llni shtë Dios, cusè nabé'nèl recibir iurè bèdchi'bè

guia'a ra mè guani'si guèquèl, iurè guni'i rai' cusè nagúnèl.

<sup>15</sup>Guagla'guè gúnèl cumplir ra cusè rè' con guèdubinú ldú'ul parè gac bè'a mieti lla ziaaglá'guèl másru'u delantè con lè'è mè. <sup>16</sup>Gupè cuidadè mizmə lé'él nu gupè cuidadè enseñansè naquègluá'al, nu guagla'guè gáquèl firmè lu shnezè mè. Si talè quèhúnèl zndè'è, gúnèl segurè salvaciuni shténèl nu salvaciuni shtë ra narquè diagué shti'dzèl.

#### Conductè shtë Timoteo lu mènè

**5** Adè rní'idi'il guèc ra mè guani'si naná encargadè con shchi'ni Dios, sino guni'inú lè'è rai' con rèsptèi ziquè ruadí'dzènul shtádèl. Nu biadi'dzènú lè'è ra nguui de menos edá cumè si fuèrè na rai' béchil. <sup>2</sup>Bè'nè tratè ra na'a gushè cumè ziquè mizmə shní'al, nu ra na'a de menos edá, biadi'dzènul lè'è rai' ziquè zánèl. Gápèl rèsptèi parè lè'è rai'.

<sup>3</sup>Bè'nè compa'ni ra viudè, perè sulè ra naná viudè nanadè nápèdi'i famili. <sup>4</sup>Si talè tubi viudè nápi' shíni' u shinillágui', ra shíni' napè què tsasè rall runè tucarè gúnèll compa'ni ra shtádi' u shmámi'; zni quilli rall lo què naze'bi rall. Ni na correctè gunè tubi shmènè Dios. Lu Dios na za'quin nu nahin voluntá shtë mè. <sup>5</sup>Tubi viudè de verdá lu Dios, na el què nanápèdi'i ni tubi shfamíli', nu tsagla'guè rialdí ldú'i' Dios, nu quèhúni' oraciuni dzè la gue'lè. Quèhúni' ruèguè lu Dios. <sup>6</sup>Perè lè'è viudè nariagla'guè téchi deseo mal nananú la'ni ldu'i, pues nall ziquè tègulè aunquè nabánill.

<sup>7</sup>Gunibë'a grë ndë'e lu ra viudë të parë guëquërelde rall bien sin ni tubi faltë. Iurní nídí'i nicidá parë guëñí'il guëc rai'. <sup>8</sup>Perë si talë tubi shmënë Dios nédí'i gápëll shfamíllil u ra naquëreldeñú lídchill, pues hia bëqué guíá'all shti'dzë Dios; nall más peor quë tubi nadë rialdídi'i ldu'i Dios.

<sup>9</sup>Lu listë shtë ra viudë, adë rquë'ëdi'il lë grë rall, sulë ra nanapë sesenta izë u más, ra nagupë tubsë tsé'li', <sup>10</sup>ra nabë'në obrë za'quë lu sáhi' ziquë ra nagupë bien shíni', ra nabë'në recibir visitë lídchi', ra nabë'në sirvë con galnadu'u ra shmënë Jesús, ra nabë'në compa'ni ra naquëhunë sufrir lu cusë dushë, ra nazianaldë tēchi ra cusë za'quë. Ra viudë ni na verdá. Runë tucarë gunë të compa'ni lë'ë rai'.

<sup>11</sup>Perë adë rquë'ëdi'il lu listë lë ra viudë lliguë purquë iurë ra deseo mal guëdchini stubi, rlua'a tēchi rai' lu Cristo nu rac shtu'u guëtsë'a rai' stubi. <sup>12</sup>Pues iurní napë rai' faltë purquë adë bé'nédí'i rai' cumplir primëre comprumisi shtë rai' con Dadë Jesús. <sup>13</sup>Más de ni, quëac rall nabëchi lu dchi'ni; ria rall hiu'u por hiu'u; lëdë niá'asëdi'i galnabëchi sino nu zac ruadi'dzë rall cusë adë guëllu'idi'i nu riutë rai' asuntë adë rúnëdi'i tucarë lë'ë rai'. <sup>14</sup>Por ni rní'a'a, ra viudë lliguë guëtsë'a rai' stubi të gapë rai' shini rai'; guëñibë'a rai' prupi shfamili rai' të parë adë guëdë'ëdi'i lugar guëdchi'bë Satanás galquiá cuntrë shmënë Dios. <sup>15</sup>Pues hia bëldá viudë bësa'në rall shnezë Jesús parë zianaldë rall tēchi Satanás.

<sup>16</sup>Si talë tubi shmënë Dios, sea na'a u nguiu, nanú viudë entrë shfamíllil, runë tucarë lë'ëll gúnëll compa'ni viudë ni të parë nídí'i nicidá parë grupë shtë shmënë Dios gapë rai' na'a ni, sino gunë rall compa'ni ra viudë de verdá, el quë nanápëdi'i famili nu adë pë nápëdi'i rai'.

<sup>17</sup>Ra më guani'si, ra narnibë'a ra shmënë Dios, si talë quëhunë rai' bien, los de más mënë napë quë gunë rall rëspëti lë'ë rai' ziquë tubi muzë narunë tucarë chupë pagu. Rëspëti ni runë tucarë especialmente ra naruadi'dzë diza'quë nu el quë narlua'a shti'dzë Dios. <sup>18</sup>Pues Sagradas Escrituras rni'i: "Adë rgúdi'il guë'shu rua' ngunë naná rguitsë bë'dchi'", nu zac rní'in: "Ra narunë dchi'ni, nápëll derechë parë pagu shtë rall".

<sup>19</sup>Adë rúnëdi'il cuendë grë ra naná rdchi'bë ra galquiá cuntrë ra më guani'si entrë ra shmënë Dios, sulë si nanú chupë u tsunë testigu, iurní sí, bë'në casë lë'ë rall. <sup>20</sup>Perë ra naziagla'guë runë duldë, pues rqui'ni guëñí'il guëc rall delantë lu grë ra shmënë Dios të parë los de más sa' rai', guëdë'ë rai' cuendë nadzë'bë na cashtigu shtë më. <sup>21</sup>Runa incarguë lë'ëll delantë lu Dios nu Dadë Cristo Jesús nu delantë ra ianglë naquëbezëñú Dios, de quë tsaglá'guëll tēchi ra rëglë rë'; bë'në juzguë bien; bë'në tratë igual grë sa'l. <sup>22</sup>Adë riúbëdi'i ldú'ul parë guëdchi'bë guíá'al guëc ra mënë parë gunë rai' recibir carguë entrë los de más shmënë Dios. Adë gápëdi'il partë con duldë shtë stubi mënë sino gápëll mizmë lë'ëll de grë duldë.

<sup>23</sup>Ziquë zihani vüeltë rac ll'u'u lán'il, bi' du'pë vini, lëdë sulë nísëdi'i të parë guëac lán'il.

<sup>24</sup>Ra cusë mal naquëhunë bëldá nguui, lueguë rlu'a'ain; napë quë gac juzgar rall. Ra cusë mal naquëhunë sëbëldá nguui, naga'chi nahin iurne' perë napë quë guëru'u'in lu llni. <sup>25</sup>Igual na con cusë za'quë naquëhunë nguui. Bëldá vësë clarë rlu'a'a rahin lueguë; nanú adë rluá'adi'i rahin lueguë, perë adë nídi'i mudë guëa'në ra cusë ni naga'chi por llëduni tiempë.

**6** Grë ra naná bajo ordë shtë ra lamë, pues rqui'ni gapë rall llëru'bë rëspëti lu shlamë rall të parë adë chu guëni'idi'i mal cuntrë Dios shtë hia'a nu cuntrë diza'quë shtë Jesús. <sup>2</sup>Si nanú ra naná bajo ordë shtë lamë naná rialdí ldu'i diza'quë, pues rqui'ni másru'u gapë muzë ni rëspëti lu lamë purquë nall shmënë Jesús. Runë tucarë lë'ë muzë gúnëll dchi'ni lu lamë purquë nall tubi sa' narunë recibir resultadë shtë dchi'ni naquëhunë muzë, nu rac shtu'u Dios lë'ë lamë ni. Bëlu'a'a di'dzë rë' lu rall nu guni'inú lu mënë cunseju rë'.

**Ldai' za'quë parë guëquitë ldu'u mënë**

<sup>3</sup>Si talë chu quëglua'a stubi cusë falsë, cusë nanádi'i de acuerdë con enseñansë za'quë shtë Dadë Jesucristo, u si talë adë rialdídi'i ldú'ull diza'quë narni'i lla gunë mieti cumplir shti'dzë Dios, <sup>4</sup>pues nguui ni adë rac bé'adi'ill niétiquë; rac shtú'ull mizme lë'ëll. Nanú deseo mal la'ni ldú'ull purquë nalë rac shtú'ull tildi dí'dzëll con

sa'll. Rdildi dí'dzëll subrë pë runë cuntienë dí'dzë. Hia de nga'li ze'dë ra cusë ziquë mbidi, dishi'bi, nu rushtiall lu sa'll, nu napë rall mal llgabë cuntrë sa' rall. <sup>5</sup>Rguili rall dí'dzë con ra sa' rall. Na rall mënë nabëniti nezë za'quë shtë Dios. Adë guënëdi'i rall verdá. Quëglua'a rall enseñansë shtë rall parë gunë rall gan dumí. Adë gápëdi'il tratë con mënë ni. <sup>6</sup>El quë naquëhunë cumplir shti'dzë Dios, adë pë rúnëdi'i faltë lë'ëll, por ni rquitë ldú'ull. <sup>7</sup>Pues sin quë ni tubi cusë bëdchínia'a lu guédchiliu nu iurë gátia'a, guziá hia'a, adë chu bë guá'adi'i. <sup>8</sup>Si talë nápa'a naguëdáuha'a con shába'a, nadë más con ni cha guëquitë ldu'u hia'a. <sup>9</sup>Perë grë ra narac shtu'u gac ricu, runë rall duldë; rluquë rall la'ni trampë shtë mëdzabë. Napë rall llgabë nadë guëllu'idi'i nu napë rall zihani deseo mal nanua'a lë'ë ra nguui lu cashtigu; rniti rall nu rialú mënë ni parë siempër. <sup>10</sup>Mënë rac shtu'u rall gapë rall dumí, perë amor shtë dumí na ziquë lu'chi shtë grëtë' clasë cusë mal. Pues por galërzebi ldu'u dumí, bëldá mënë bëniti rall lu shnezë Dios. Bësëdchini rall zihani dulurë mizme lë'ë rall.

**Tsagla'guë tsaldí ldú'ul Dios**

<sup>11</sup>Lë'ël Timoteo, nguui nagulé Dios, bëllu'në lu grë ra cusë rë'. Gáquël më za'quë lu Dios; guagla'guë nezë za'quë; tsaldí ldú'ul Dios; gac shtu'u sa'; gáquël më pacënci lu sa' nu gáquël më nadu'u. <sup>12</sup>Ziquë tubi nguui rdildi con fuersë lu deportë, zni runë



tucárël. Bě'ně segurē vidē eternē; parē ni guna'bē mē lē'ël iurē bē'nēl testificar lu zihani mēnē blac rac shtú'ul lē'ē mē. <sup>13</sup>Iurne' delantē lu Dios, el quē nardē'ē vidē parē grētē' ra cusē, nu delantē lu Cristo Jesús, el quē nadē bēdzēbēdi'i lu Poncio Pilato sino guní'i' verdá lu Pilato, quēgnibē'ahia lē'ël, <sup>14</sup>bě'ně cumplir diza'quē. Gapē mizmē lē'ël de grē cusē mal parē adē chu guēnī'idi'i guéquēl tē adē chu guēnī'idi'i cuntrē diza'quē por causē shtēnēl hashtë iurē guēabrí Dadē Jesucristo stubi. <sup>15</sup>Iurē guēga'a iurē, Dios gunē mē cumplir grētē' ndē'ē. Benditē na mē. Na mē lúniquē Dios pudērusē narnibē'a. Na mē Rēy naná lasac lu más quē los de más rēy. Na mē Dadē naná lasac lu grē ra dadē shtë guédchiliu. <sup>16</sup>Na mē lúniquē nadē rátidi'i. Quērelde mē lu llni catē ni tubi adē chu riabí'guēdi'i. Ni tubi mēnē adē chu guná lúhi' nu gáquēdi'i guēná rall lu mē. Shtēnē mē na grē hunurē nu derechē parē guēnibē'a mē parē siembrē. Amén.

<sup>17</sup>Grē ra naná ricu lu guédchiliu rē', guni'inú lē'ē rall adē gunē narú'bēdi'i rall lu sa' rall, nilē parē

tsaldídi'i ldu'u rall dumí nanapē rall purquē lēdē segurēdi'i na cusē ni. Sino gunibē'a lu rall tsaldí ldu'u rall Dios, mē el quē rne'ē grētē' ra cusē hashtë de subrē parē guēquitē ldu'u hia'a. <sup>18</sup>Gunibē'a lu rall tē parē gunē rall bien con dumí nanapē rall. Gac rall ricu lu Dios con dchi'ni za'quē naquēhunē rall. Runē tucarē gunē rall ayudē con guēdubinú ldu'u rall ca'a ra mēnē nanapē nicidá. Adē gáquēdi'i rall nadzabē sino mē za'quē. <sup>19</sup>Zni gunē rall tē parē gapē rall tesurē verdaderē naná ziquē cimientē shtë hiu'u narialúdi'i parē tiempē naze'dē.

#### Fin shtë cartē

<sup>20</sup>Timoteo, gupē ra enseñansē shtë Jesús nagunia'a lul; adē riutēdi'il lu ra shti'dzē mēsē falsē. Ruadi'dzē rall cusē naná guēlluí'idi'i. Adē rdildi dí'dzēdi'il con shti'dzē rall naná falsē aunquē rni'i rall na rahin di'dzē narac bē'a grē mēnē. <sup>21</sup>Bēldá mēnē guanaldē tēchi ra enseñansē shtë rall nu bēniti rall shnezē Dios.

Favurē shtë Dios guēa'nin con lē'ël. Amén.